

# مناضل

كانت تفرق معاك  
لو كنت لسه  
تحت رياسة الرفيق المناضل  
اللي باع الهتافات  
والزهور البلاستيك  
ع الرصيف الثاني.

كان يمكن اتكتبتك شقه دورين  
ورصيد دافي ف البنك  
وعريه شيروكي  
وشوية ابتسامات  
ف مذكراته الشخصيه.

وكمان ما كنتش حتركب أتوبيسات  
ف عز الزحمه  
وتبهدل بين الجماهير المعجبه  
بحسه الثوري  
وصيحاته الوطنيه  
اللي حط بقيتها ع الكوميدينو  
قبل ما يعلق صورته  
ع الشماعه  
وينام.

كان ممكن برضه تفوز برضاه  
وتمتع نفسك  
بحاجات لسه بتحلم بيها  
وتفكر فيها بصوت واطي  
وبرعشه خفيفه  
سقطت منك قدام التليفزيون  
لما بص عليك  
وإداك ضره.

دلوقتي انت  
الصوره القديمه  
اللي ممكن يرميها  
من شباك عريته المرسيديس  
وهو رايح مؤتمر.

وممكن كمان  
يطردك م الصورة الفوتوغرافيه  
اللي أخذتها  
وانتو بتضحكوا بصوت عالي  
ف عيد شم النسيم  
من ٢٧ سنة.

وجايز يفكر فيك  
خمسة ست ثواني  
كل ما يشوفك  
ويمط شفاهه باستغراب  
وكأنه ما سرقش قلمك الحبر  
وربع جنيه  
وهو شايل شنطتك  
لما كنتوا راجعين م المدرسه.

حاجات زي كده  
مكن تحصل  
ويمكن كانت فرقت خالص  
”زي ما قلت ف أول القصيده“  
لو كنت بقيت زيه  
وهو رافض يقعد مع نفسه  
وخايف  
ليقابل حد تاني!

ديسمبر ٢٠٠٣